



საჯარო სამართლის იურიდიული პირი
სოციალური მომსახურების სააგენტო

ბ რ ძ ა ნ ე ბ ა



KA030487710655113

№ 04-446/ო

15 / ნოემბერი / 2013 წ.

ჯანმრთელობის დაცვის სახელმწიფო პროგრამების შერჩევითი შემოწმების ინსტრუქციის დამტკიცების შესახებ

„2013 წლის ჯანმრთელობის დაცვის სახელმწიფო პროგრამების დამტკიცების შესახებ“ საქართველოს მთავრობის 2013 წლის 31 ოქტომბრის N279 დადგენილების მე-4 მუხლის გათვალისწინებით, ამავე დადგენილებით დამტკიცებული „2013 წლის ჯანმრთელობის დაცვის სახელმწიფო პროგრამების“ მე-10 მუხლის მე-3 პუნქტის, საქართველოს ზოგადი ადმინისტრაციული კოდექსის 53-ე და 61-ე მუხლებისა და საქართველოს შრომის, ჯანმრთელობისა და სოციალური დაცვის სამინისტროს 2013 წლის 11 ნოემბრის N01/100383 (N04/100176, 08.1102013 წ.) წერილის, საქართველოს შრომის, ჯანმრთელობისა და სოციალური დაცვის მინისტრის 2007 წლის 27 ივნისის N190/ნ ბრძანებით დამტკიცებული „საჯარო სამართლის იურიდიული პირის – სოციალური მომსახურების სააგენტოს დებულების“ მე-4 მუხლის საფუძველზე,

ვ ბ რ ძ ა ნ ე ბ ა:

1. დამტკიცდეს „ჯანმრთელობის დაცვის სახელმწიფო პროგრამების შერჩევითი შემოწმების ინსტრუქცია“ (დანართი N1).

2. დაევალოთ:

ა) სააგენტოს ჯანმრთელობის დაცვის პროგრამების დეპარტამენტს:

ა.ა) საერთო ზედამხედველობა გაუწიოს სააგენტოს ტერიტორიული ერთეულების მიერ ამ ბრძანების პირველი პუნქტით დამტკიცებული ინსტრუქციის შესაბამისად, შერჩევითი შემოწმების პროცესს;

ა.ბ) განსაზღვროს ქ. თბილისის მასშტაბით, შერჩევითი შემოწმების განმახორციელებელი პირები და კოორდინაცია გაუწიოს მათ საქმიანობას;


ბ) აჭარის ავტონომიური რესპუბლიკის ფილიალის და რეგიონალური საკოორდინაციო ცენტრების უფროსებს, განსაზღვრონ დაქვემდებარებული თანამშრომელი, რომელიც უზრუნველყოფს შერჩევით შემოწმებას და წერილობით წარმოადგინონ შემოწმებული პირ(ებ)ის მონაცემები სააგენტოს ცენტრალურ აპარატში.

3. სააგენტოს ადმინისტრაციამ (გ. გოგოლაძე) უზრუნველყოს აღნიშნული ბრძანების და მისი დანართის სააგენტოს ოფიციალურ ვებ-გვერდზე (www.ssa.gov.ge) მიმწოდებლებისათვის განკუთვნილ ველზე განთავსება.

4. ამ ბრძანების ამოქმედებისთანავე, ძალადაკარგულად გამოცხადდეს „ჯანმრთელობის დაცვის სახელმწიფო პროგრამების შერჩევითი შემოწმების ინსტრუქციის დამტკიცების შესახებ“ სსიპ-სოციალური მომსახურების სააგენტოს 2011 წლის 30 აპრილის № 04-82/ო ბრძანება.
5. ბრძანების შესრულებაზე კონტროლი დაევალოს სააგენტოს დირექტორის მოადგილეს, კახა ხელაძეს.
6. ბრძანება ძალაშია ხელმოწერის დღიდან.

დირექტორის მოვალეობის შემსრულებელი

ნოე ქინქლაძე



ჯანმრთელობის დაცვის სახელმწიფო პროგრამების შერჩევითი შემოწმების ინსტრუქცია

1. „ჯანმრთელობის დაცვის სახელმწიფო პროგრამების შერჩევითი შემოწმების ინსტრუქცია“ (შემდგომში–ინსტრუქცია) შემუშავებულია საქართველოს კანონმდებლობის შესაბამისად და მიზნად ისახავს, ხელი შეუწყოს ჯანმრთელობის დაცვის სახელმწიფო პროგრამებით (შემდგომში – პროგრამები ან პროგრამა) გათვალისწინებული ზოგიერთი ღონისძიების რეალიზაციას და ამ პროგრამების განხორციელების ზედამხედველობის პროცესს.

2. ინსტრუქციაში გამოყენებულ ტერმინებს გააჩნიათ იგივე მნიშვნელობა, რაც გათვალისწინებულია პროგრამებით, მათთან დაკავშირებული ნორმატიული და ადმინისტრაციულ–სამართლებრივი აქტებით. ამასთან, ინსტრუქციაში გამოყენებულ ქვემოთ მოცემულ ტერმინებს გააჩნიათ შემდეგი მნიშვნელობა:

ა) შეტყობინების სისტემა – სამედიცინო შემთხვევების რეგისტრაციის მოდული (კომპიუტერული პროგრამა), რომელშიც, მოქმედი კანონმდებლობის შესაბამისად, ფიქსირდება ინფორმაცია პროგრამის მიმწოდებლის მიერ პროგრამის ფარგლებში გასაწევი ან გაწეული სამედიცინო მომსახურების შესახებ;

ბ) შემმოწმებელი – სსიპ – სოციალური მომსახურების სააგენტოს თანამშრომელი, რომელიც უზრუნველყოფს პროგრამაში მონაწილე მიმწოდებლის მიერ შეტყობინებით დაფიქსირებული შემთხვევების შერჩევით შემოწმებას.

3. პროგრამაში მონაწილე მიმწოდებლის შერჩევითი შემოწმება მოიცავს შეტყობინების სისტემაში მიმწოდებლის მიერ დაფიქსირებული მონაცემების შედარებას რეალურ ფაქტებთან.

4. შერჩევით შემოწმებას ექვემდებარება მიმწოდებლის (ან მიმწოდებლების, ერთობლივად) მიერ ყოველდღიურად დაფიქსირებული ყოველი მე–5 შემთხვევა, თუ ყოველდღიურად დაფიქსირებული შემთხვევების რაოდენობა აღემატება 10

ერთეულს. შემმოწმებლის უშუალო ხელმძღვანელის გადაწყვეტილებით (ჯანმრთელობის დაცვის პროგრამების დეპარტამენტის უფროსი), შესაძლებელია გაიზარდოს ყოველდღიურად შესამოწმებელ შემთხვევათა რაოდენობა და შერჩევის წესი.

5. თუ ყოველდღიურად დაფიქსირებული შემთხვევების რაოდენობა არ აღემატება 10 ერთეულს, შემოწმებას ექვემდებარება ყველა შემთხვევა.

6. შერჩევითი შემოწმება ხორციელდება შეტყობინების მიღებიდან არაუგვიანეს მომდევნო 2 სამუშაო დღეში. იმ შემთხვევაში, თუ გასული დღე წარმოადგენს უქმე ან/და დასვენების დღეს, შემოწმება ხორციელდება ასევე, არაუგვიანეს 2 სამუშაო დღეში, გასულ უქმე ან/და დასვენების დღეებში შემოსული შეტყობინებების ერთობლიობიდან.

7. შერჩევითი შემოწმების განხორციელების მიზნით, შემმოწმებელი უზრუნველყოფს შეტყობინების სისტემიდან შემოწმებისათვის საჭირო ინფორმაციის ამოღებას (ამობეჭდვას), თითოეულ მოსარგებლეზე ინდივიდუალურად, რომელიც აგრეთვე მოიცავს შემთხვევის შემოწმების აქტის რეკვიზიტებს და გამოიყენება ამ აქტის გასაფორმებლად.

8. შერჩევითი შემოწმება ხორციელდება მიმწოდებელთან შემმოწმებლის ვიზიტის დროს.

9. მიმწოდებელთან ვიზიტის დროს, შემმოწმებელი ახდენს მოსარგებლის იდენტიფიცირებას შეტყობინების სისტემაში დაფიქსირებული მონაცემების მიხედვით, კერძოდ:

ა) იმ შემთხვევაში, თუ მოსარგებლე სრულწლოვანი პირია, შემმოწმებელი უზრუნველყოფს მის იდენტიფიცირებას:

ა.ა. ვიზუალური მონაცემის მიხედვით (შეტყობინების სისტემაში დაფიქსირებული მოსარგებლის ფოტოსურათთან შედარება, ასეთის არსებობის შემთხვევაში);

ა.ბ. პირადი ნომრის მიხედვით;

ა.გ. სახელის, გვარის და დაბადების თარიღის მიხედვით;

ბ) იმ შემთხვევაში, თუ მოსარგებლე 18 წლამდე ასაკის პირია, შემმოწმებელი უზრუნველყოფს მოსარგებლისა და მისი კანონიერი წარმომადგენლის (მშობელი, მეურვე, მზრუნველი) იდენტიფიცირებას:

ბ.ა. ვიზუალური მონაცემების მიხედვით (შეტყობინების სისტემაში დაფიქსირებული კანონიერი წარმომადგენლის ფოტოსურათთან შედარება, ასეთის არსებობის შემთხვევაში);

ბ.ბ. პირადი ნომრის მიხედვით (18 წლამდე ასაკის პირთან მიმართებაში ამ მონაცემის არსებობის შემთხვევაში);

ბ.გ. სახელის, გვარის და დაბადების თარიღის მიხედვით;

გ) სამედიცინო ისტორიის საფუძველზე, შემმოწმებელი ამოწმებს:

გ.ა. მოსარგებლის მიმწოდებელთან შესვლის ფორმას;

გ.ბ. მოსარგებლის სამედიცინო დაწესებულებაში შესვლის თარიღს და დროს;

გ.გ. შეტყობინების სისტემაში დაფიქსირებულ დიაგნოზს;

დ) იმ შემთხვევაში, თუ მიმწოდებლის მიერ გასაწევი სამედიცინო მომსახურება გეგმიურია და ამ მომსახურებაზე გაცემულია მატერიალიზებული ფორმის ვაუჩერი ან თანხმობის წერილი, შემმოწმებელი ვალდებულია, ნახოს ვაუჩერი ან თანხმობის წერილი და შეამოწმოს მისი მოქმედების ვადა.

10. კონკრეტული შემთხვევის შემოწმების მიზნით, მიმწოდებელთან ვიზიტი ხორციელდება ერთხელ. საჭიროების შემთხვევაში, უშუალო ხელმძღვანელის დავალებით შემმოწმებელი უფლებამოსილია, განახორციელოს განმეორებითი ვიზიტ(ებ)ი.

11. შემთხვევის შემოწმების დასრულების შემდეგ, შემმოწმებელი და მიმწოდებლის წარმომადგენელი ხელს აწერენ შემოწმების აქტს.

12. მიმწოდებელთან (მიმწოდებლებთან) ვიზიტის დასრულების შემდეგ, შემმოწმებელი უზრუნველყოფს შემოწმების შედეგების ასახვას შეტყობინების სისტემაში. შემმოწმებელს შეტყობინების სისტემაში შეაქვს მის მიერ აქტში დაფიქსირებულ კომენტარი (ასეთის არსებობის შემთხვევაში) და შემოწმების შედეგზე დაყრდნობით, უთითებს შემთხვევის შესაბამის სტატუსს („ექვემდებარება ანაზღაურებას“, ან „არ ექვემდებარება ანაზღაურებას“, ან „სადაო“).

13. იმ შემთხვევაში, თუ მიმწოდებლის წარმომადგენელი უარს აცხადებს აქტის ხელმოწერაზე, შემმოწმებელი აქტის შესაბამის გრაფაში („კომენტარის ველი“) აკეთებს მითითებას მიმწოდებლის წარმომადგენლის მხრიდან აქტის ხელმოწერაზე უარის თქმის და მიზეზების შესახებ. ამასთან, აფიქსირებს შემთხვევის შესაბამის სტატუსს.

14. შემთხვევის შემოწმებისას, შემმოწმებელი ხელმძღვანელობს პროგრამით და მასთან დაკავშირებული ნორმატიული და ადმინისტრაციულ-სამართლებრივი აქტებით.

15. შემმოწმებელი ვალდებულია, გამჟღავნებისაგან დაიცვას საქართველოს მოქმედი კანონმდებლობით საიდუმლო ინფორმაციას (პირადი საიდუმლოება, სამედიცინო საიდუმლოება, კომერციული საიდუმლოება) მიკუთვნებული ის მონაცემები, რომლებიც მისთვის ცნობილი გახდა შერჩევითი შემოწმების განხორციელების პერიოდში. ეს ვალდებულება შემმოწმებელზე ვრცელდება სააგენტოსთან შრომითი ურთიერთობების შეჩერების ან შეწყვეტის შემდეგაც.

16. წინამდებარე ინსტრუქციით გათვალისწინებული ფუნქციების (უფლებამოსილებების) შესრულებაზე სრული პასუხისმგებლობა ეკისრება იმ შემმოწმებელს, რომელმაც უზრუნველყო შერჩევითი შემოწმება.